



卷第一千四

金華府部彙考二

金華府山川考二

府縣志合載

武義縣

竹巖山在縣東一十四里鎮山也

明招山在縣東一十五里望山也宋東萊呂成公講學

於此公與其祖好問及弟祖儉之墓皆在焉正德十三年縣丞林有年立碑以昭先賢遺跡

白陽山在縣東七里周三里白雲出岫卽雨上有異石色隨時變歲豐則黃歉則黑鄉人以此

占候東陽山水記云晉阮遙集之弟妻劉氏劉伶之女並好山水渡江來隱張彥卿爲永康令

亦棲於此二姓子孫因家焉

小姬山在縣東十里中有溪號姬水故名舊經云晉金談爲

吳興太守後辭疾隱此

蘊山在縣東十五里有張天師廟

蠟屐山在縣東二十里

晉阮孚之裔多居其下因名

講堂山在縣東二十里傳云梁劉峻築室講書於此

蟠

龍山在縣東南五里形如蟠龍

蔣富山在縣東南三十五里周二十餘里山多產茶傳云

昔有蔣氏居此致富因名

金桂山在縣南二十里巔有懸瀑下瀉臨水築小亭葦栗齋名

白水簾

菊妃山在縣南三十里多生蘭菊旁有妃水溪故名

白草山在縣南四十里

近山半里間有二石夾道若門歷此曲折險逕始至山巖中有一石突出若蓮座昔異人支大

士居之名大士庵

窖山在縣西南一里

九峯山在縣西南三十里

湖山在縣西

二里山有潭水故名歲旱鄉人視山爲候凌晨有雲氣則曰湖山裏帽是日必雨

書臺山

在縣西三里與湖山聯唐舒元與讀書處

翔鸞山在縣西七里俗傳嘗有鸞棲其上

大家山在縣西二十里其南有新婦山兩山相向世傳晉張彥卿女出適累月姑婦並亡有神

靈各主一山每大家山起雲新婦山卽雨

蝴蝶山在縣西二十里

銅釜山在縣西三

十里形如覆釜正統十四年括寇熾鄉民多避難其上時名銅釜寨

石巖山在縣西北七

里 白塔山在縣西北一十里有塔今廢

青龍山在縣北九里巖高五十丈周三里

遠望如青龍上平曠有小石洞亦登覽勝景也

李公山在縣北一十五里周二里宋隱士

李惠居此人高其志故名

牛山在縣北一十五里形如牛

龜山在縣北二十里周一

百步形如龜

八素山在縣北四十里周二十里東陽山水記云秦末有八士從洛陽來逋

棲於此皆青素冠履因名唐泰和八年廉察使牒縣附之圖經而姓名則竟不傳也

瞻山

按通志縣北十里

葵山按通志縣北一十四里

歷山按通志縣西二十里

尖秀

峯在縣西南二十里

十二婆嶺在縣東二里

白陽嶺在縣東一十五里

毛栗嶺

在縣東三十里

南倉嶺在縣東三十五里

周嶺在縣南二里

南湖嶺在縣南五

里

石倉嶺在縣南一十里

後王嶺在縣南三十里

白草嶺在縣南三十里

小較嶺在縣南三十里

小妃嶺在縣南四十里

大妃嶺在縣南四十里宣平縣界

百長膝嶺在縣南四十里

翦蓬嶺在縣南四十里

稽較嶺在縣南六十里麗水縣界

燕山嶺在縣西南十里明正統十四年尙書石璞總兵官徐叅統兵過此勦截處寇改名烏龍

嶺

盛嶺在縣西南三十五里縉雲界

鋪嶺在縣北二十五里

龍門嶺在縣西南

四十里

佛堂嶺在縣西十里

萬安嶺在縣西二十五里

宏閣嶺在縣西二十五

里

後樹嶺在縣西三十里

雙巖嶺在縣西四十里

成嶺在縣西北二十五里

茶碭嶺在縣西北三十五里

白嶺在縣北一里嶺半有藝旱樓

邵家嶺在縣北二十

五里笑客嶺在縣北二十五里

石倉嶺在縣東南二十五里

玲瓏巖在縣東三十五

里石竅玲瓏相透若斲成者因名又名金公巖卽劉女棲隱之所上有峻石若剖大甕側立百丈轉左五十步曰平水洞高倚斷崖下瞰天井井水深澄大旱不涸行可二百步嶺最峭絕扳藤捫石方得至巖上前有一山壁立崔嵬若屏若幄曰招聖峯旁有小山頽然偃仆若冠履枕肱狀曰仙人臥後一山石壁峨然簇擁曰仙都壇其崖石巉峭高百餘丈鑿石梯而上絕頂方稍平惠力寺在焉正統間鄉人多避括寇於此山 金雞巖在縣南石巖側古僧詩云自是

世人無兩耳幾曾不爲五更啼

寶泉巖在縣南二十里上有方池廣丈五尺深數尺甚旱

不竭其泉甘美宜瀹茗

大門巖在縣西南三十里正統十四年括寇熾鄉民多避於此

九峯巖在縣西南三十五里

苦竹巖在縣西十五里

石鵝巖在縣西十五里形如鵝

故名

藏金巖在縣西十五里教龍寺旁

劉巖在縣西三十五里昔劉氏棲隱之所因

名一名金石巖巖石峻拔鑿石梯升巖頂前有一山陡峭若屏幄然曰招聖峯後一山廓然石

屋深廣五十丈曰仙都壇正統十四年避寇於此者以萬計竟免於患 魚鷹巖在縣西北

二十里上有魚鷹之形 雙巖在縣西四十里自山下迤邐而上五六里有石室二舊蔽於

草莽洪武甲辰年金華涂元吉剪闢因石室以構禪院 石城巖在縣北一十五里白塔山

下新巖按縣志在縣西南三十五里石竅嵌空儼若天造隆慶年間有道人募千金構一禪宇

門疊石磴通鳥道景物幽奇觀者叢至今毀 萬靈巖按縣志在治東南三十里徐永源建

庵名曰天池高峻絕塵亦巖之最高者 楊梅岡在縣南二十里 十里岡在縣西南九

里白塔岡在縣西北一十五里 履坦岡在縣北一十里又名隴岡 窰岡在縣北一十

里東岡在縣北一十五里 楊柳岡在縣北二十五里 葉兒坑在縣東二十五里

張坑在縣東三十里 龍門坑在縣西南二十五里 雙坑在縣西南二十五里 茶

曹坑在縣西二十里 黃皮坑在縣西三十里 山坑在縣北二十里 葉長坑在縣

北二十五里 八仙坑在縣北三十里 學士坑在縣東北二十里昔有學士墓故名

禾坑在縣東北二十五里 蔗坑在縣南二十五里出糖毬 桃花塢在縣西南三里

巖塢在縣西二十五里

黃塢在縣西北五里

俊塢在縣北一十五里

阮塢在縣

北十五里

余家塢在縣西四十里

南塢在縣南七里下蘇埠有亭

孫李塢在縣

西北五里

八仙洞在縣東北二十五里

郭洞在縣南二十里

金牛洞在縣東北

一十五里

石馬在縣南二里其形肖馬旁有小孔

石笋在縣南三十里其形直立肖

笋高二百餘丈周四十丈

龜石在縣東北三十五里石形類龜故名

石龍在縣東北

三十五里石文肖龍如鸞琢然舊傳望氣者以其怪鑿之

熟溪在縣西南源出處州遂昌

界流入縣西又東南流與永康溪合流其水注田常稔故名

永康溪在縣東二十五里東

南流與熟溪合又東北入金華界與東陽溪合

端村溪在縣南五里上有黃絲灘東北五

里有銅爐灘

左溪在縣南二十里源出石牛山下東流禾村合郭衙溪至端村

郭衙

溪在縣南二十里合左溪至端村

南溪在縣西南三十里源出處州大梨樊嶺俞源劉巖

劉休五溪會於此以上俱注永康溪

白姥溪在縣西三十五里出三斷山裏照源會熟溪

巖下溪在縣西二十五里

烏溪在縣西二十五里

大家溪在縣西二十里源出大家

山流入金華界與駐石溪合

苦竹溪在縣西二十里源出大妃嶺流入熟溪

雙坑溪

在縣西二十里源出龍門嶺東北流以上俱注熟溪

桃溪在縣西北一十五里有桃夾岸

因名其流東北入清溪北一十里爲湖頭一十二里爲清潭灘一十五里爲牛牯灘

八素

溪在縣北四十里源出八素山入金華界與狀石溪合以入雙溪之南港

泉溪按縣志以

源不竭故名

清源溪按縣志在治南四十里源出清溪山經於丁姑廟

白姥源在縣

西三十里其源出三斷山龍潭

裏照源在縣西四十里

菊陽源在縣西南四十里

郭衙源在縣南二十五里

白陽潭在縣東五里

斗潭在縣東五里

毛狸潭在縣

東一十五里

晏公潭在縣東南熟溪門外舊有晏公廟今廢

九里潭在縣東南九里

風雨晦冥之夕鐘聲隱隱出潭中嘗有漁人入潭捫鐘見旁有屋廬類佛宇歲旱禱於此

烏龜潭在縣東南七里潭中有石如龜

石倉潭在縣東南二十五里

湖山潭在縣西

二里

南湖潭在縣西五里

燕山潭在縣西一十里

瀛潭在縣西十里歲旱車水

不竭

俞學潭在縣西一十里

五爪潭在縣西二十五里有巖石如龍五爪

三斷

龍潭在縣西七十里廣二十五丈中有龍潛值旱禱之輒應宋紹興十八年夏不雨府司遣官禱於潭俄有物如練長七八尺盤旋久之忽失所在水騰湧而起須臾雲霧晦冥雨沛然下有右宣教郎添差通軍州呂忱中撰記 馬蹄潭在縣南四十里 大王潭在縣北一十里

王婆潭在縣北一十五里

山坑潭在縣北二十里

龜潭在縣北二十里

碓頭潭

在縣北二十里

清潭在縣北一十里

八素潭在縣北四十里夏旱秋水溢旱則沙磧

漲露渡潭迤邐而上又有八潭呼爲九井嘗有善水者自潭游渡攀岸而上遍歷九井每山一曲則有一井相去各里許第九井之上山谷深窈潭水清澈境趣殊勝歲旱鄉人募善水者渡潭取水迎龍或得物如鱣如蛇則皆謂之龍然不過二三井必獲感應至第九井人亦罕到潭水下流經八仙廟入狀石溪 白楓湖在縣東二十里 西湖在縣東南七里 南湖

在縣南五里

東湖在縣南二十里

草馬湖在縣西南五里

王趙湖在縣北八里

長湖在縣北一十二里

天碧湖在縣北一十里

古泉在縣東五里

張泉在縣東

五里

後溪泉在縣東一十五里

毛狸潭泉在縣東一十五里

黃雌泉在縣東一

十五里 遶泉在縣東一十五里 楊泉在縣東北二十里 大遶泉在縣東一十五

里 酒方泉在縣東北二十里 來下泉在縣東北一十里 吳家泉在縣東二里

尤泉在縣東北三十里 醴泉在縣西書臺山下 大悲泉在縣西三十里 雙泉在

縣西五里 麻車潭泉在縣西二十五里 後樹潭泉在縣西二十五里 寶泉在縣

南二十里 石頭泉在縣南一十五里 童泉在縣北一十五里 西隴井在縣東一

十五里 甘泉井在縣南二十里 彭城井在縣西一里 雙井在縣南三里 石

井在縣北一十五里 龍鳴井在縣北一十里 九井在縣北四十里 義井在縣東

三槐坊

浦江縣

仙華山在縣北八里一名仙姑山又名少女峯東陽志謂軒轅少女於此上升故名 周公

山在縣南十里其狀若巨人儼坐幃幕中蓋縣之向山也 龍峯山在縣東一里環峙縣左

地勢廻旋而靈冲之氣不洩蓋縣治之輔山也其巔有塔七層 深島山在縣西五十里重

峯複嶺峭拔萬仞其下溪流清澈澄無泥滓蓋浦江之原委也

湖山在縣東十里兩山對

立江水中流又名湖山峽說者謂縣治水口此其第一關也

登高山在縣東二十五里相

傳爲太史呂伯恭重九日於此登高故名

金芙蓉山在縣東二十五里一名香巖山白麟

溪之源出焉溪側有孝感泉

元麓山在縣東二十六里有飛泉宋濂與鄭元數觀之造

飛泉操鼓之琴書諸崖石其辭曰飛泉兮瀏瀏洗耳固非兮胡飲我牛覆謂我汙兮移彼上流

具人之形兮奈何忘人之憂

東明山在縣東三十里大澤中隱然突起元青田尉邵德璋

創精舍於此以教其族人內有成性四勿繼書九思四齋旁有水一泓曰靈淵淵之東百步許

有泉泠然老梅橫蹕其上曰梅花泉

青蘿山在縣東三十里元至正三年宋濂築青蘿山

房自金華徙家於此所著有青蘿山雜言

雞冠山在縣東三十五里山極高晴霽時登之

可俯矚二百里外滄茫中見一綫微白者錢塘江也

球山在縣東四十里聳峙水口又名

球山峽

黃堊山在縣東南五十里又二十里而界於諸暨

石牛山在縣東南三十五

里山側有池池中有石牛水涸而見載在呂東萊越錄中

康侯山在縣東南三十五里一

名官巖上有胡侍郎廟山半有穴若屋可容數人絕頂有池深可三四尺週迴二十五丈久雨不增旱亦不減 高峯山在縣南十五里如插筆名貴人峯 白石山在縣南十五里

烏蜀山在縣南三十五里其山突然中起衆山皆左右環衛梅溪之源出焉 小嵩山在縣

西南三十五里蘭谿之西有嵩山山有中岳廟元帥蔣可大作寨於此岳神効靈後遷居墩頭遂遷其廟於此因名 保安山在縣西南五里山頂有巖巖下有罅深不可測其麓有保安

寺 壺盤山在縣西南五十五里金華北山之北高出衆山至蘭谿縣界 四全山在縣

西十五里類金木水火土四星因名 巖坑山在縣西北五十里山有水分流東流爲巖坑

北流爲湖溪水抵富陽以達於浙江 寶掌山在縣北八里與僊華山近唐僧寶掌大師棲

禪處山前雙峽對峙沿澗奇石若虎豹狻猊鐘鼎刀戟上下錯列前有高巖湧石類翩躚飛舞之狀亦號飛來峯下有泉甘冽折而北有石離立浦陽山水惟此與仙華爲最勝云 藥壺

山在縣北二里一名寶靈巖 小孤山在縣北三十里巉巖險峻而人不能升 大孤山

在縣北四十里峭削壁立無可攀援而旁巒環拱映帶清溪流峙交翠蓋獨勝也下有崇因院

赤巖山在縣北四十里在衆山間

羸塢山在縣北五十里與響巖山聯峙

響巖山在

縣北五十里大汛與檀溪二水流其下踰盤洲金沙環折萬山流入富陽江

蕩釜山在縣

北九十里與赤巖羸塢聯峙

九靈山在縣北九十里山有九峯故名戴良居於此

左

溪山在縣東北二十五里山有唐僧元朗墓在亂石間前有巨石高廣丈餘平正可鐫

江

公山在縣東北六十里山形如雞足高出羣峯登眺則越中諸山雲浮海立皆在指顧間

石臺盤山按縣志去縣南二里高平爽曠太祖取金華李文忠下浦江與諸暨張士誠相距堅

旗設烽墩於此

茅廬山按縣志去縣北十五里高百丈廣三十餘丈橫互八九里上有峭

壁疊嶂層巖類重樓複閣諸山蒼翠四面環拱若屏幄然堪輿家謂浦之名山前數仙華參天

玉笋岵巒玲瓏後數茅廬拔地金城莊凝突兀並奇秀云

黃茅山按縣志去縣南三十里

錢適梅執禮二尚書之居隸焉

七星山按縣志去縣南三十里聯絡如七星故名

老

虎尖山按縣志去縣南三十五里拔起衆山如大將登壇羣阜陳列爲一方瞻仰

西康山

按縣志去縣南四十里峻麗如筆架落日棲霞晚眺尤勝

石壁山按縣志去縣南三十五

里巔屹壁立俯瞰清溪相傳古村落修禊於此

鐵甲山按縣志去縣西南四十里巔嵒麟

次山多安石榴花開如錦袍褐甲

八角山按縣志去縣二十里在仙華山後

鳳山按

縣志在仙華麓宋時於此植梅數里又名梅塢明張應槐仍舊址結廬曰三陽小隱

三十

六岡在縣東三十五里重巒複嶂前後相屬參差不齊人行其上如登霄漢

五路嶺在縣

南十里長五里自縣入郡城所經也

太陽嶺在縣南五十里高險與太陽齊因名浦江金

華之界路也

白巖嶺在縣南三十五里左溪之源出焉與大嶺之水合流而下又名雙溪

東流入浦陽江

棗竹嶺在縣東北五十里一民淡竹自山趾至巔凡十八盤上有古神祠

質營嶺在縣東北九十里一名竹斤下有竹斤澗界於富陽

東山嶺按縣志去縣東一里

上有真武廟前令文元發建春亭歲久圯吳應台重建之前爲接官亭

金坑嶺按縣志去

縣北十里

杭口嶺按縣志去縣西北十里

井坑嶺按縣志去縣西四十里與建德爲

界險與竹塞坑同

截柘嶺按縣志去縣西四十里與建德爲界

步虛嶺按縣志去京

南三十里與義烏爲界

鹿獅岩卽烏蜀山柳貫讀書之石室也

密溪岩在縣南三十

五里砦下爽塹寬平若堂宇可容三百人砦上有泉四時如簷滴 轉輪砦在縣南三十五

里狀如車輪其上平曠數畝餘建胡則廟於中禋祓多應 竹塞坑在縣南三十里兩山翠

合高入雲漢行者甚危 龜坑在縣西北七十里坑底有潭正黑旁敞若釜鬻不可駐足山

多獼猴爲患 金坑按縣志去縣北十里恆有奇黃沙色轉入西菴有內外龍門內龍門兩

山石壁湊合如構成衞衙高十數仞下有龍窟紺泉外龍門屈曲重關如屯軍堆甲武備森然

有石峯插天亦謂之小仙姑山 銀坑按縣志去縣西三十里恆有白光躍伏 寶掌洞

在縣北十里窟如方丈 浦陽江一名浦陽泖在縣南界謝惠連西陵遇風詩云昨發浦陽

泖今宿浙江湄韻譜云水之相入爲泖又云水北曰泖蓋自浦陽江北流入浙江二水參錯故

名曰泖源出縣西深島山東流又北流一百二十里至越之諸暨縣溪始通舟楫又東北流由

峽山直入臨浦灣以入於海按浦江本吳越三江之一春秋外傳所謂三江環之者是已江水

雖微而與吳松錢塘並稱者獨入海也俗名小江一名錢清江酈道元水經注浦陽江導源烏

傷縣東逕諸暨與泄溪合 左溪在縣東二十五里其源出白巖大嶺兩山間合流而下

白麟溪在縣東二十五里其源出金芙山麓東流入江 深溪在縣東二十里源出義烏龍

祈山西流至縣南注於浦陽江 東溪在縣東一里源出仙華山南流入江 吳溪在縣

南十里 稿溪在縣南十里源出白石山東流入江 梅溪在縣南三十里源出烏蜀山

西流入蘭谿界 西溪在縣西一里源出坑口山南流入江 湖溪在縣北二十里源出

坑巖山北流抵富陽縣界以達於大江 五泄溪在縣北五十里輿地志云山峻而有五級

故以爲名 下柳溪按縣志去縣東四十里 劉源在縣南五十里有龍潭在焉一名龍

門 靈澤潭在縣南十里白石山相傳神龍居之歲早禱卽應宋嘉定三年勅封靈澤

龍潭在縣南一里舊名龍溪歲旱禱之卽應 放生池在縣東南一里龍德寺東宋咸淳元

年知縣王霖龍置建亭池上歲久亭圯 洗鉢池在縣東二十三里左溪寺側 四角井

在縣西二里雖深不踰尺而泉水甘冽居民朝夕汲之不竭其名甚著於邑 樂山井在縣

西二十五里 月泉在縣西二里源出縣北僊華之下其泉視月盈虛爲消長宋政和間縣

令王霖龍構精舍於泉上元改爲月泉書院 孝感泉按圖經在白麟溪側初鄭綺母張性

嗜溪水值旱鑿數仞而不得泉綺乃慟哭其下三日不息水爲湧出人以爲孝感所致綺卒葬於溪上至今紺碧甘冽爲第一泉 梅花泉在東明山精舍中有水一泓曰靈淵淵之東百步許有泉冷然老梅如龍橫踞其上故名 飛錫泉在縣東二十二里左溪寺之西廡下相傳寺舊無泉寶掌師與元朗遊因飛錫引泉注之故名 斤竹澗按縣志去縣東北九十五里

湯溪縣

九峯山在縣南十里高數百丈峯巒秀拔巖洞玲瓏望之似蜂窠焉昔葛洪來遊丹竈猶存唐徐安貞肄業於此石楊尙在先賢龍丘萇仙人鄧去奢俱家於山下 福民山在縣東南四十里高數百餘丈峯巒秀拔林木蒼鬱實東南之勝槩山頂有廟層樓疊閣遠挹數百里景物遊目騁懷者多登之 紫芝山在縣東五里其地有牧雲庵 西霞山在縣東十五里紺塘繞於其畔 湖山在縣東南二十五里 吳婆山在縣東南三十里 石人山在縣東南三十五里 屏風山在縣東南四十里狀如屏風故名 乾山在縣東南四十五里